



বগুড়ায় সড়ক দুর্ঘটনায় আহত শিশুর চিকিৎসার দায়িত্ব নিলেন প্রধানমন্ত্রী



প্রধানমন্ত্রী তারেক রহমান। ছবি: সংগৃহীত

বগুড়ার শেরপুরে ভয়াবহ সড়ক দুর্ঘটনায় একই পরিবারের চারজন নিহত হয়েছেন। অলৌকিকভাবে প্রাণে বেঁচে যাওয়া দেড় বছরের এক শিশু এখন গুরুতর আহত অবস্থায় চিকিৎসাধীন। তার উন্নত চিকিৎসার সম্পূর্ণ দায়িত্ব নিয়েছেন প্রধানমন্ত্রী তারেক রহমান।

প্রধানমন্ত্রীর অতিরিক্ত প্রেস সচিব আতিকুর রহমান রুমন এ তথ্য নিশ্চিত করেছেন। তিনি জানান, শিশুটিকে দ্রুত ঢাকায় নিয়ে ন্যাশনাল ইনস্টিটিউট অব নিউরোসায়েন্সেস অ্যান্ড হাসপাতাল-এ ভর্তি করা হচ্ছে। উন্নত চিকিৎসা নিশ্চিতের প্রধানমন্ত্রী সরাসরি সংশ্লিষ্ট কর্তৃপক্ষের সঙ্গে কথা বলেছেন।

শিশুটির চিকিৎসা ব্যবস্থাপনা তদারকিতে প্রধানমন্ত্রী বগুড়া জেলা প্রশাসক এবং শহীদ জিয়াউর রহমান মেডিকেল কলেজ হাসপাতাল-এর পরিচালকের সঙ্গে যোগাযোগ করেন। পরে ঢাকার নিউরোসায়েন্সেস হাসপাতাল কর্তৃপক্ষের সঙ্গেও কথা বলে সর্বোচ্চ চিকিৎসাসেবা নিশ্চিতের নির্দেশ দেন। পাশাপাশি শিশুটির সব চিকিৎসা ব্যয়ভারও তিনি গ্রহণ করেছেন।

বুধবার সকালে ঢাকা থেকে রংপুরগামী ১২ জন যাত্রী বহনকারী একটি মাইক্রোবাস শেরপুর, বগুড়া এলাকায় দুর্ঘটনায় পড়ে। ঘটনাস্থলেই একজন নিহত হন। আহতদের হাসপাতালে নেওয়ার পর চিকিৎসক শিশুটির বাবা-মাসহ আরও তিনজনকে মৃত ঘোষণা করেন।

জেলা প্রশাসন জানিয়েছে, নিহতদের মরদেহ রংপুরের কাউনিয়া, রংপুর নেওয়া হয়েছে। সেখানেই তাদের দাফন সম্পন্ন হবে। ঈদ উদযাপনের জন্য পরিবার-পরিজন নিয়ে গ্রামের বাড়ি ফিরছিলেন তারা; পথেই ঘটে এই মর্মান্তিক দুর্ঘটনা।